

誠齋集

冊四

楊文節公詩集卷之二十四

宋吉水楊萬里廷秀甫著

長陽後學彭

淑秋潭甫校訂

繡谷宗裔

雲彩四峯甫同校

朝天集

瑞香花新開十詠

外著明霞綺中藏淡玉砂森森千萬筍旋旋兩三花

二

小霽迎風喜輕寒索幕遮香中真上瑞蘭麝敢名家

三

老子觀書倦昏然睡思來夢中誰喚醒牕外瑞香開

四

只道花頭細能追國豔回慙慙伴幽獨渠與一瓶梅

五

短短薰籠小團團錦帊圍浮陽烘酒思沉水着人衣

六

茉莉通家遠椒花具體微春愁渾瘦盡別有瘦中肥

七

雪裏移蒼斛梢頭點翠芒只消三日煖便坼數花房

八

紫袖染難透瓊膚灑轉香小留供鼻觀開去未須忙

九

馨德潛邱壑春風足往還新從衆香國移種洞庭山

十

孤韻真無對千花莫扳騷經吾欲續譜入芷蘅關

謝李元德郎中餉家釀二首

長史銜杯太白醺談詞笑殺古來人至今太白一船酒不飲還將飲子雲

惠山山下玉泉香釀作鵝兒一拂黃吏部只知防姓畢不知吏部有他楊

初出貢院買山寒毬花數枚

寒毬着意殿餘芳小底來禽大海棠初喜豔紅明蒼子忽看淡白散花房風光不到棘闈裏春色也尋茅舍傍便有蜜蜂三兩輩喙長三匝繞枝忙

紫牡丹二首

萬花不分占春妍究竟專春是牡丹紫錦香囊金屑暖翠羅舞袖掌文寒恨無國色天香句借與風條日萼看家有洛陽一千朵三年歸夢繞欄干

歲歲東風二月時司花辛苦染晴枝夜輪百斛薔薇水曉洗千層玉雪肌寒食清明空過了姚黃魏紫不曾知春愁覺得眉尖破何處如今更有詩

上巳同沈虞卿尤延之王順伯林景思游湖上隨和韻得十絕句呈之同社

鵝袍林裏遇芳辰聞道春來不識春及至識春春已老于中更老是詩人總宜亭子小如拳着意西湖不見痕湖上軒牕無不好何須抵死揀名園

孤山山後北山前十里長堤隔兩邊一桁垂楊絲舞鳳石橋通處過春船
天色纔鬆未肯收吾儕自樂不曾愁隨宜旋旋商量着晴卽閒行雨卽休
籃輿休上馬休騎濕却青鞋也不辭揀取雨絲疎處去攜筇且謁水仙祠
雨催杖屨却須回捲上疎簾眼頓開十里湖光平似鏡柳梢梢外一船來
湖上春游只愛晴何朝何夕不清明絕憐疎雨微雲裏點綴湖山分外清
憑久欄干可一杯湖山飛入水中來多情燕子能相勸舞破東風去却回
今年山路少人來酒肆蕭然綺席埃政爾坐愁春寂寞畫船簫鼓忽如雷
岸上湖中各自奇山觴水酌兩皆宜只言游舫渾如畫身在畫中元不知
跋濠溪汪立義大學致知圖

杏壇何物是家風只在當人阿堵中誰作新圖漏消息濠溪溪上釣魚翁
此事元無淺與深着衣喫飯送光陰却緣說似癡人夢便向汪家圖裏尋
景靈宮聞子規

今年未聽子規聲忽向宮中樹上鳴告訴落花春不管徘徊曉日恨難平斜風

細雨又三月柳絮浮雲空一生豈不懷歸歸未得倩渠傳語故園鶯

寄題劉成功錦里

嘉林市中塵一丈嘉林寺後竹千竿先君授徒竹窗底我初識君俱少年同師
同舍同筆硯火冷燈青飛雪片春風一夜吹林花南北飄零各星散我今頭白
苦思歸羨君山園芋栗肥爲君題作小錦里君應一笑巾墮几

讀淵明詩

少年喜讀書晚悔昔草草迨今得書味又恨身已老淵明非生面穉歲識已早
極知人更賢未契詩獨好塵中談久睽暇處目偶到故交了無改乃似未見寶
貌同覺神異舊玩出新妙琬空那有痕滅跡不須掃腹腴八珍初天巧萬象表
向來心獨苦膚見欲幽討寄謝賴濱翁何謂淡且槁

送謝子肅提舉寺丞二首

天台山秀古多賢晚向池塘識惠連十載江湖州縣底一言金石冕旒前方陪
廷尉甘棠舍又賦皇華小雅篇拾得澄江春草句端能染寄陟釐牋

誰遣孤舟蓑笠翁強隨桃李競春風交情頃刻雲翻手古意淒涼月印空可笑
能詩今謝朓也曾載酒過楊雄待渠歸直金鑾日我已煙沙放釣筒

送錢寺正出守廣德軍二首

四十專城古已稀君侯五七更英奇九重臨遣廷尉正千里驩迎循吏師鴻雁
同科金玉律鸛雛先集鳳凰枝少年勇退無人會孤竹初心遜伯夷

寺正與兄同大法之

科寺正先召用今其兄補外將還朝寺正力請外以遜其兄進取

辛卯中書落筆年曾陪學士堵牆間看渠手把州麾去故里春迎晝錦還我似
青蒿君玉樹君方綠鬢我蒼顏一尊話別休辭醉報政歸來紫禁班

鄉士李英秀才得老潘墨法善作墨梅復喜作詩良齋日以三奇贈之七
字予復同賦云

吾鄉李君磊砢胸夜持雲梯倚秋空中奪得修月斧斫倒南山千歲松束歸
丹竈和玉桂燧出綠霧霏鸞龍擣成玄圭與蒼璧灑作橫枝歲寒色庾嶺霜林
和靖園掇入生綃供戲劇幻松作壁壁作梅豪氣勃鬱尙不開瓊醖滿酌梅雪

下吐出西湖有聲畫

送姜夔堯章謁石湖先生

釣璜英氣橫白蜺咳唾珠玉皆新詩江山愁訴鶯爲泣鬼神露臺天洩機彭蠡
波心弄明月詩星入腸肺肝裂吐作春風百種花吹散瀕湖數峯雪青鞋布襪
軟紅塵千詩只博一字貧吾友夷陵蕭太守逢人說君不離口袖詩東來謁老
夫慚無高價當璫璵璣翻然却買松江艇徑去蘇州參石湖

三月二十六日殿試進士待罪集英殿門

金卮瑤堦日月邊曉風花柳帶霏煙千官劍佩鳴雙闕萬國英豪到九天玉座
忽臨黃繖正御題初出紫衣傳小臣何幸陪諸老待罪重來十六年

余壬辰春亦以省試

主司待罪

九虎遮藏造化機御題過午始聞知乾坤闔闢兼文武雲漢昭回具訓詞武帝
上嘉真戲耳放勳清問政如斯諸儒莫作公孫士千載何曾遇聖時

趙達明大社四月一日招游西湖十詠

今日清和和又清王孫領客出都城好天勝日能多少三到西湖始一晴
畫舫侵晨繫柳枝主人生怕客來遲嬌雲嫩日無風色幸是湖船好放時
船從詠澤過孤山徑度琉璃一簾間隔岸多情楊柳樹向人招喚俯煙鬟
御池水滿苑門開泥帶飛花路帶苔到得孤山翻作惡海棠開日不曾來
萍生兒子點疎星荷捲文書立萬丁回首南高峯上塔手中攀得玉玲瓏
橘花如雪細吹香杏子團枝未可嘗行到隋朝枯柏處孤山山背水中央
和靖先生墳已荒空餘松竹故蒼蒼王孫自洗鸕鷀杓滿酌真珠醑一觴
行盡孤山碧四圍却尋初路得來時好風借與歸船便吹近瓊林却不吹
風撩太液小荷欹日麗長楊花影低闌入苑中啼不住恨身不及一黃鸝
蔥蘢晚色正佳哉苦被歸鞍緊緊催船壓浮荷沉水底須臾船過却浮來

紅玫瑰

非關桃李姓名同不與薔薇譜牒通接葉連枝千萬綠一花兩色淺深紅風流
各自臙脂抹雨露何私造化功別有國香收不得詩人熏入水沈中

省中直舍因敲新竹懷周元吉

老眼逢書怯細看抄書一事更應難昨攜如意敲新籜右臂朝來作許酸
尙有周郎手種痕懷人將竹當人看寄言黃鶴樓前客今歲新添十五竿
老竹堅剛幼竹柔此君年少也風流錦衣脫體未全瘦雪粉圍腰猶半愁
含笑

大笑何如小笑香紫花不似白花妝不知自笑還相笑笑殺人來斷殺腸

枇杷

大葉聳長耳一梢堪滿盤荔枝分與核金橘却無酸雨壓低枝重漿流冰齒寒
長卿今尙在莫遣作園官

走筆送濟翁弟往浙東謁邱宗卿二首

出省還家思已昏答書見客腹仍煩政愁獨酌無佳客家裏詩人忽叩門
若見邱遲問老夫爲言臞似向來臞更將雙眼寄吾弟帶去稽山看鑑湖

題西湖僧房

竹林深處着禪房下却疎簾百炷香書畫隨宜遮四壁閑欹瓦枕小藤牀

省中見樹上啄木鳥戲題

一啄高高一啄低一聲急急一聲遲可憐去蠹勞心口蟻入枯梨自不知

山丹花

春去無芳可得尋山丹最晚出雲林柿紅一色明羅袖金粉羣蟲集寶簪花似
鹿葱還耐久葉如芍藥不多深青泥瓦斛移山蘼聊着書窗伴小吟

四月十七日侍立集英殿觀進士唱名

殿上臚傳第一聲殿前拭目萬人驚名登龍虎黃金榜人在煙霄白玉京香滿
乾坤書一卷風吹鬢髮雪千莖舊時脫却銀袍處還望清光侍集英

無題

坐看猢猻上樹頭旁人只恐墮深溝渠儂狡獪何須教說與旁人莫浪愁

張功父索余近詩余以南海朝天二集示之蒙題七字

作者于今星樣稀淒其望古駟難追空桑孤竹陶元亮玉佩瓊琚杜拾遺自笑

吟秋如懶婦

蟋蟀也見古今注

可能擊鼓和馮夷報章不作南金直慚愧君家丙藁詩

蒲萄架

纔喜盤藤捲葉生又驚壓架暗陰成
夏寒涼潤青油幕秋摘甘寒黑水精
近竹猶爭一尺許拋鬚先鬣兩三莖
今年乞種西江去長是茅齋怯晚晴

送沈虞卿祕監修撰將漕江東二首

蓬萊仙伯沈東陽領袖諸儒太極旁
東壁二星雲漢近西崑羣玉簡編香
雞翹豹尾無多子錦纜牙樯有底忙
建業江山入詩集却歸天上侍虛皇

再入修門訪舊遊故人相見喜還愁
茂林修竹君髯碧折葦枯荷我鬢秋
莫把升沉着懷抱古來賢聖幾公侯
一尊追送江東棹夢逐清波弄白鷗

謝焉

我本南溪老手弄溪中雲誦詩愛招隱
讀騷續湘君忽捧公府檄遂遠先人墳
春莫歸未得落花政紛紛

老拙誰肯伴束書自相隨此外無長物猶有一鷗夷小醉卽孤詠自遣不要奇
西湖妙天下未羨習家池

謫仙幾代孫今日臨賀承風月三千首吾子豈未能長把修月斧細彫玉壺冰
天池羽翼就卽看垂天鵬

曲江與臨武彼此皆相望一嶺大如礪誰云隔尋丈離合非人力此事要天相
升沉亦偶然豈問腴與澁

買山藝花竹長恐落人後不見竹林人山王非俎豆市門能幾許掉臂日奔湊
稚子來朝天商略陳薄陋

游水月寺

菽日薦雲乍暑天倦投山寺借牀眠清涼世界誰曾到却在紅塵紫陌邊

題水月寺寒秀軒

小寺深門一逕斜繞身縈面總煙霞低低簷入低低樹小小盆栽小小花經藏
中間看佛偈竹林外面是人家山僧笑道知儂渴共起迎賓且瀹茶

歸塗觀劉寺新疊石山

風月肝脾冰雪胸道人妙手鑿虛空
斷翻諸嶺雲煙骨幻出山巖紫翠峯
細看分明非釘鉸如何凋得許玲瓏
爲誰苦死忙歸去知是斜陽是晚鐘

題劉寺僧房

曾醉山間金叵羅山應識我我懷他
頓添花竹明松檜依舊菰蒲暗
菱荷試問錦屏無恙否向來梅樹已無多
未須看遍新亭榭勝日重來一一過

和巖州添倅趙彥先寄四絕句

不見王孫今九春新詞麗曲爽心神
只言風月平分破却是江湖一散人
自搏蒼壁自抄書雪乳一瓶香一爐
有得俸錢無吏責如公官況世間無
昌歎佳辰風自南黃梅釀出雨
蓂蓂綺琴繡段能分似報不如儀
獨不慚雛鳳今年又一鳴芝蘭秀發
不曾停州前爭探黃金榜却報城隅
最冷廳

戲題簷前蜘蛛

屋角籬邊竹樹陰可憐用盡許機心
凝身不動如無物頓網輕搖試有禽
絲貫

日華明五色戲隨風舞忽千尋看渠經緯來還去忘却摧隤立不禁

故王氏令人挽詩

貝葉參祇樹著簪當副笄來嬪舍人樣如古大夫妻鸞誥金花濕芝庭玉樹齊
藥成奔月去寂寞海山西

西掖梧方茂南瀕藻已蕪謝庭風絮遠潘室月窗孤有訓才吾子無人乳阿姑
弔賓成白鶴卜地得青烏

錢仲耕殿撰侍郎挽詩

易髓三爻表恩波九里揚貫珠程氏傳炊玉范家莊荷橐中年紫芸籤到老香
不應踰耳順便返白雲鄉

使節三持玉州幡兩畫熊雪山郇寶白漕水太倉紅理世非輕士才難會憶公
石峯當西子作殉送青楓

周子及監簿輓詩

及一作皮

科目連雙中聲名慕二疏手曾扳折檻客有泣辭車造化非吾事偷閑只古書

黑頭黃壤去有昊定何如

投老欣相得論心恨較遲披文流涕疏分韻泛湖詩天奪過逢樂人興殄瘁悲何須金馬客解製玉樓辭

洪丞相挽詩

乾道扶初旭中台煥五雲纔登右丞相已拜大觀文胡不遲期月看渠集茂勳一朝驚玉折千載嘆芝焚

家譜忠仍孝詞林博更宏牧羝無是子雛鳳有難兄誰謂身非達其如道不行青蠅滿天地白日轉清明

跋忠敏任公遺帖

任公名伯雨

市中貨鳩作參苓遮莫秦和苦口爭殺盡蒼生消底物卞京兩把老蔓青

公帖中謂

曾布爲參又卞京謂故首句云二蔡也

同尤延之京仲遠玉壺錢客

南漪亭上據胡牀不負西湖五月涼十里水風已無價水風底裏更荷香

金杯玉酒沈

去聲

寒冰青李來禽尙帶生不是此間無暑氣湖風吹取過臨平

玉壺錢客獨趙達明未至云迓族長于龍山且談道中事戲爲之記二首

南山行盡到西湖却上扁舟赴玉壺十里便成三十里暑中何處不長塗

公子從來火傘中解衣未定語忽忽山行觸熱端何事夾路楊梅樹樹紅

食蓮子

綠玉蜂房白玉蜂折來帶露復含風玻璃盆面冰漿底醉嚼新蓮一百蓬

白蓮

井花新插白芙蕖坐看紛紛脫雪膚自拾落英浮水面玉舟撩亂滿江湖

酷暑觀小僮汲水澆石假山

堂後簷前小石山一峯瘦削衆峯攢忽騰絕壁三千丈飛下清泉六月寒乃是

家僮聊戲事倒傾古井作驚湍老夫畏熱年來甚更作跳珠裂玉看

清曉湖上三首

山腰輕束一綃雲湖面初顰半蹙痕未說湖山佳處在清晨小出湧金門